

根本說一切有部毗奈耶卷第四十五 仕五

唐三藏法師 義淨 奉 制譯

入王宮門學處第八十二之二

爾時薄伽梵在室羅伐城逝多林給孤獨園

時此城中有三長者一名善與二名善合三

名戒勝此三長者各有別德因而立名能善

廣施謂善與長者言無虛誑謂善合長者衆

人信伏謂戒勝長者善能忍怒謂勝光王離

邪欲心謂哥羅太子時憍薩羅國至八月半

後多有賊盜名為秋賊彼諸賊侶共相集會

作如是議我等云何於此時中少作劬勞多

獲財物於一年內受用隨情一人告曰今此

城中善合長者多有資財珍寶豐足我等宜

往到長者處共為誣枉報言長者我等先有

一億金錢寄長者處我今須用可見相還若

言虛者我等共引戒勝長者而為證人獲此
資財於一年中豐足受用一人告曰彼戒勝
長者豈為我等作證人耶餘人議曰我以强
力逼令作證問曰如何强力答曰此戒勝長
者性多慚恥若大便時必當遠出村外入深
林薄我當伺候彼欲去時執持利刀於草叢
住彼若來至我即執捉告言長者若與我為
證爾命得存若也相違交斬君首諸人聞已
咸云善計作此方便為證不難即各持刀往
我勝長者大便之處於叢薄中潛身而坐時
彼長者於大便時至所行處在草叢內被賊
所擒告言長者為當樂死為求活耶長者告
曰我實不知君等何意賊曰當隨我言報曰
隨汝所作諸賊告曰若隨我語斯則命存必
若相違刺刃非遠長者曰有何言教賊曰與

我作證長者曰何事須證賊曰善合長者我等先寄金錢一億今欲徵索恐彼不臣須得人證長者曰此爲實寄爲是虛言賊曰此是虛言長者聞已作如是念我寧守死不爲詐事豈避一生之苦於無量劫受諸惡報作是念已向諸羣賊而說頌曰

寧以守法取終亡 不作背法而存命

守法定得昇天樂 背法當生地獄中

時彼長者說此頌已爲諸羣賊略宣法要告言諸君當知爾等皆由前世惡業因緣作欺誑事雖得人身衣食常乏今復更爲不善於此命終當生何道除三惡趣無處相容作如是等種種勸喻諸賊聞已起信敬心即便俱來禮長者足白言長者我等愚癡不開善惡欲以非法共相誣謗旣蒙告喻深心慶喜我

等今時欲何所作長者曰無越三歸及五學處爲善趣因即便爲受三歸五戒至盡形壽不殺生等諸賊歡喜奉辭而去復次勝光王有一小弟名曰哥羅顏貌端嚴衆人愛敬至長淨日來詣佛所禮佛足已請受禁戒旣受得已從座而去於一靜處檢攝內心是時魔女莊飾容儀來至其所告言王子今旣少年應受欲樂衰暮之後方可攝心王子聞已告魔女曰汝以癡心迷惑於物我持淨戒不習邪途時彼魔女知王子意固守至誠不遂所求隱形而去爾時善與長者來詣佛所禮佛足已在一面坐聽佛說法時勝光王亦來佛所欲申禮敬至逝多林門命左右曰汝往佛所看有何人使入便見善與長者佛邊聽法廣如上說乃至王出門外告左右曰汝若見

彼長者出時報云大王有教長者速去離我國中時有諸天於長者處心生敬重聞是語已各懷忿恚於王身上便放毒蜂既被蜂螫疾入宮內蜂仍不放隨入宮中王被毒螫更無別計即還佛所禮足而白忽被蜂螫不審何緣唯願世尊救濟於我佛言大王由王向於善與長者起瞋恚心欲驅出國諸天忿怒放此毒蜂王曰我有此過今何所為佛言大王宜應就彼而申懺謝王曰我媿謝時禮其足耶佛言不應致禮應至彼前而執其手告言長者我出麤言幸見容恕時勝光王蒙佛教已至長者所而申懺摩長者見已共相容恕彼諸羣蜂咸皆四散衆人見者各生希有時勝光王白佛言世尊我處王位從彼庶人而求懺謝豈非希有佛言大王大自在人於

卑賤類而求懺謝斯實希有善與聞已白世尊曰我貧無物隨有常施此豈不是希有事耶佛言雖貧能施斯亦希有時戒勝長者及哥羅王子亦在佛邊戒勝長者具以秋賊而白世尊我為喪命因緣不行誣枉此豈不是希有事耶佛言雖有命難情存質直斯亦希有哥羅王子白言世尊魔女妖妍來相惑亂我拘戒行不為非法此豈不是希有事耶佛言若人富貴能受禁戒遠離邪欲於諸世間斯實希有爾時世尊以此因緣說伽陀曰

仕五

四

若人處尊位 求謝於卑微 或復少資財
隨有能行施 設遭於死難 不生欺詐心
富貴簡邪情 此四咸希有

爾時貧善與長者戒勝長者哥羅王子親對佛前各問深義世尊如理隨事而答時勝光

王亦在其中見彼發問不解其義但知瞻仰
心懷憂悒禮佛而退既還宮中以手支頰心
懷憂悒時勝鬘夫人見王憂色問言大王從
何所來容色憂悴王以事報夫人曰由王寡
聞不閑佛法國務之際可讀佛經王曰我今
年邁不能習讀又復國務繁劇無暇尋經若
汝勝鬘及行雨夫人讀佛經者我於夜中聽
受文義夫人曰善時勝鬘夫人便白王曰我
生憍薩羅國聖者鄔陀夷亦生憍薩羅國我
當就彼而受經業其行雨夫人亦白王曰我
生摩揭陀國聖者舍利子亦生摩揭陀國我
當就彼而為讀誦王曰各隨所樂時勝光王
往舍利子所申敬事已白言大德行雨夫人
於尊者所欲受經法唯願慈悲哀申教授舍
利子曰我今宜往白世尊知即往佛所禮佛

仕五

五

足已白言世尊王欲請我為行雨夫人授佛
經法是事得不佛言應教舍利子還至王所
報言世尊慈愍許我相教時勝光王既蒙許
已復詣具壽鄔陀夷處白言聖者勝鬘夫人
欲就尊者受學佛經廣說如上乃至許我相
教王見許已便還宮內報二夫人曰彼二大
德許相教授時二大德於日中來入宮內
為二夫人教讀佛法後於異時勝光王國邊
隅反叛王遣師伐被敗而歸如是二三乃至
七返皆被他破逐北旋兵王聞敗已便作是
念邊隅逆命師去被降須我自行方能翦剋
王即嚴整四兵於後夜時師旅而去具壽舍
利子善識時宜其鄔陀夷不知機變夜聞兵
馬鈴鐸之響即便驚覺作如是念豈非王眾
有事他行即於未明作天明想執持衣鉢入

王宮中時有內人報勝鬘夫人曰阿遮利耶
鄔陀夷今來至此夫人聞已著輕紗衣出門
迎接時鄔陀夷見彼夫人形體踈露注目而
視夫人知已便生恥媿還入宮中更著餘衣
至鄔陀夷所敬受經教再三反復猶未天明
宮人見之共生譏議作如是語王雖信敬情
無間然苾芻不識時機中宵而至王未藏寶
及諸寶類而便造次輒到宮門時鄔陀夷教
其讀誦迄至天曉勝鬘夫人問曰聖者今朝
何處當食鄔陀夷曰隨所得處我當噉食夫
人即取其鉢盛滿飯食授鄔陀夷彼得鉢已
願言無病持之而出至王門下見舍利子從
外而來鄔陀夷問曰大德若作如是精進用
心云何能得斷諸煩惱我侵明起早入宮中
爲彼夫人教授經法并受鉢食持出宮門仁

仕五

六

今始來何晚之甚舍利子曰具壽可去佛緣
此事當制式又時諸少欲苾芻聞是事已便
往白佛世尊以此因緣告諸苾芻入王宮者
有十種過失云何爲十一者王與夫人在一
處住苾芻入時夫人便笑王即生疑豈非夫
人與彼苾芻於私屏處行鄙惡事若不爾者
何因見笑或可有心將爲惡事二者苾芻入
宮夫人有娠王生是念豈非苾芻共爲惡行
令其有娠三者苾芻入宮王失珍寶及諸寶
類王作是念豈非苾芻偷竊我物四者王有
密語聞徹於外王作是念豈非苾芻傳通密
語五者苾芻入宮王瞋太子遷移職位太子
念曰豈非苾芻於王讒搆令我今時致此憂
感六者苾芻入宮太子於父爲不義事諸人
聞已豈非苾芻傳通密語令失孝義七者苾

芻入宮王之所重尊勝大臣被黜職位便作是念豈非芻於王讒說令我墮在不如意處八者卑位大臣王與重賞諸人議曰豈非芻爲其薦達九者王數出師征伐餘國入皆議曰豈非芻共王論說數令我等征伐疲勞十者芻入宮王出征伐告戰士曰其所得者悉皆自屬後既平殄王便却奪諸人議曰此是芻教王奪我佛告諸芻以此因緣不應輒入宮內或令四兵不得安隱此非芻之所應作

攝頌曰

夫人笑妖寶 泄言瞋太子 損王黜舉事

數征還奪財

如是乃至我觀十利爲諸芻制其學處應如是說

若復芻明相未出刹帝利灌頂王未藏寶及寶類若入過宮門闔者除餘緣故波逸底迦

如是世尊在王舍城竹林園中爲諸芻制學處已告諸芻曰瞻部洲內有六大城一名華子二名勝音此之二城互有衰盛若華子城盛則勝音城衰若勝音城盛則華子城衰時勝音城人民富盛有王御世名曰仙道正法治人國土豐樂無諸戰陣亦無病苦龍王歡喜五穀熟成廣說如上彼王夫人名曰月光顏容殊特衆所愛敬王之太子名曰頂髻有二大臣一名利益二名除患時摩竭陀國王舍城王名曰影勝以法理人國無災患如餘廣說夫人名勝身儀貌超絕國內無比王之太子名末生怨有一大臣名曰行雨是

大婆羅門種高勝貴族爾時仙道大王曾於
一時朝集大會告衆人曰頗有餘國豐樂熾
盛與我國相似不時彼衆中有摩竭陀國興
易之人作如是語大王於此東方有摩竭陀
國王舍大城王名影勝彼國豐樂與王相似
時仙道王聞此語已於影勝王生愛念心問
大臣曰彼王國內何所乏耶答曰彼處無寶
王曰喚調寶人簡取好者便以妙寶盛滿金
篋并王勅書遣使送往摩竭與影勝王語使
者曰當報彼王從今已往王可共我爲敵國
知識必有所須我當爲辦使持王信到王舍
城影勝王所奉書具白王既覽書并開國信
生大歡喜王曰彼之國中何所乏少諸人答
曰彼無好氎時王即以摩竭陀國所出上氎
盛滿箱篋准如上事報仙道王并致書曰敬

覽來信并受國珍未面相親深慚遠意彼有
須者我當爲辦使持王信到勝音城即以書
及國信奉仙道王王見慶喜問使者曰王之
形狀其量如何并問性行使者報曰影勝王
其形長大一似大王性行雄猛躬爲征戰王
即依量造五德上甲令使送去云何爲五一
者盛熱之時著便涼冷二者刀斫不入三者
箭射不穿四者善辟諸毒五者能發光明王
造甲已并裁勅書曰今贈寶甲五德圓備若
念我者幸當自著希招遠意勿惠餘人即以
此甲付與使者使者持去到王舍城便以此
甲奉影勝王白言大王此之寶甲具足五德
仙道大王故遣送來時影勝王覽書觀甲心
生希有喚調寶者令其准價寶人白言大王
此一一寶並皆無價然衆共商量准直金錢

十億王既聞已便生憂念遠方知友贈我寶
甲此一一寶其價難知我國無此如何酬謝
以手支頰低顏而坐是時行雨大臣入見大
王似帶憂色問言大王何故面有憂色王曰
我今寧得心不懷憂遠處國王贈我寶甲此
一一寶其價難知我國更無奇異珍物既無
報答爲此懷憂大臣答曰願王勿憂有好贈
物王曰何處得有大臣答曰彼之國王唯贈
一領寶甲王之國內有佛世尊乃是人中妙
寶一切有情共所尊敬十方世界無與等者
王曰誠有此事欲如之何大臣曰可於氎上
畫世尊像遣使馳送王曰若如是者我當白
佛隨佛言教當奉行之時影勝王往詣佛所
禮佛足已在一面坐以事白佛佛言大王善
哉妙意可畫一鋪佛像送與彼王其畫像法

先畫像已於其像下書三歸依云我從今日
乃至命在歸依佛陀兩足中尊歸依達摩離
欲中尊歸依僧伽諸衆中尊次書五學處一
不殺生二不偷盜三不欲邪行四不妄語五
不飲諸酒次書十二緣生流轉還滅所謂此
有故彼有此生故彼生從無明緣行乃至積
集而生此無故彼無此滅故彼滅從無明滅
乃至積集俱滅皆廣書之復於像上邊書其
二頌曰
汝當求出離 於佛教勤精 能降生死軍
如象摧草舍 於此法律中 常修不放逸
能竭煩惱海 當盡苦邊際
如是畫訖授與使人應報彼曰汝持畫像至
本國時可於廣博之處懸繒旛蓋香華布列
盛設莊嚴方開其像若有問云此是何物應

答彼言此是世尊形像捨轉輪王位而成正
覺又問此下字義云何答曰是歸依三寶爲
出離因次下云何答曰教持五戒生人天道
次下云何答曰是十二緣生明三界五趣流
轉還滅因果道理若問於上二頌其義云何
答曰斯之二頌明勸諸有情依教修行破生
死軍勿爲放逸速趣菩提時影勝王奉佛教
已歡喜頂受禮足而去王即畫像上下具書
其事以種種妙香徧熏尊像然後細卷內金
函中次以金函內銀函中次以銀函內銅函
中復以上妙香氎密裹此函置香象上嚴整
衢路幢幡導從出王舍城時影勝王并作勅
書報仙道王曰雖未相見使至覽書蒙贈寶
甲世所希有今畫世尊形像三界最尊令使
持將莫申供養既至彼已可去王城有兩驛

世五

十一

半平治道路嚴飾城隍躬領四兵幢幡華蓋
於廣博處張設尊儀慇懃供養獲大福德既
封書已持付使人勅曰如我所囑當須憶念
盡可爲之使既奉旨敬辭而去路經多日漸
至勝音城可有兩驛半在於此停住遣信白
王并持書去王得書已開讀忿怒告大臣曰
未知彼國有何奇異勝妙信物書云可兩驛
半平治道路嚴飾城隍華蓋幢幡集諸人衆
遣我自領四兵遠出迎接着此形況意欲相
輕卿等宜應總集四兵我自親往伐摩竭陀
國大臣奏曰曾聞彼王有大度量不應以隨
宜國信輕觸大王王今宜可且順其言親往
觀察若稱王意斯曰善哉如不爾者與師未
晚王曰誠有斯理隨書且作於兩驛半平治
道路乃至王自親觀依彼來書盛陳供養引

至城邑於平坦處無量百千人衆聚集香華
普設充徧街衢王開畫像瞻仰而住于時中
國商人共來觀像咸皆合掌異口同音俱出
大聲唱言南謨佛陀也南謨佛陀也其仙道
王既觀尊儀聞佛陀號見所未見聞所未聞
徧體身毛悉皆驚豎王便問曰佛陀之名何
所詮表商主答曰大王中國有城名劫比羅
跋窣覩中有淨飯王生一太子具三十二相
有八十種好相師占之云此太子若在家者
當爲轉輪聖王七寶圓滿千子具足降伏四
洲以法化世若出家者當證如來應正等覺
於人天內號曰佛陀此即是彼真容影像王
聞喜悅問曰此下文字其義云何商人曰大
王此是歸依三寶王曰次下云何答曰此明
五戒又問次下云何答曰此是十二緣生流

仕五

十一

轉還滅其上云何答曰此明勸誠厭離生死
希求涅槃皆爲廣說時仙道王聞商人說十
二緣生無明行等生滅道理善誦其文便還
宮內即於初夜依文而思於後夜時捨諸緣
務迄至天明結跏趺坐端身正念繫意現前
思量觀察十二緣生生滅道理所謂此有故
彼有此生故彼生從無明緣行行緣識識緣
名色名色緣六處六處緣觸觸緣受受緣愛
愛緣取取緣有有緣生生緣老死憂悲苦惱
如是純大苦蘊積集而生所謂此無故彼無
此滅故彼滅從無明滅則行滅行滅則識滅
識滅則名色滅名色滅則六處滅六處滅則
觸滅觸滅則受滅受滅則愛滅愛滅則取滅
取滅則有滅有滅則生生滅生滅則老死憂悲
苦惱滅如是純大苦蘊積集皆滅時仙道王

於緣生理既深曉悟不起于座以智金剛杵
摧破二十種薩迦耶見山得預流果既見諦
已遙心慶悅渴仰世尊說伽陀曰

敬禮大醫王 善療於心病 世尊雖在遠
能令慧眼明

時王歡喜即便裁書報影勝王曰我賴仁息

十五

十三

知有三寶悟緣生理得見真諦苦海淪溺彼
岸可期拔足淤泥歡慶何極然我欲得親見
苾芻為作方便令來至此使者持書至影勝
王處王讀書訖往詣佛所頂禮佛足白言世
尊其勝音城仙道王見佛形像得悟真諦遣
使持書來至於此求覓苾芻唯願世尊慈悲
發遣說是語已禮佛而去爾時世尊便作是
念誰與彼城有因緣耶能至於彼廣為化度
觀知聖者迦多演那於彼有緣能為教化世

尊便命迦多演那曰汝可觀彼勝音城內仙
道大王并諸眷屬人物之類時迦多演那唯
然受教既觀察已辭佛而出執持衣鉢入城
乞食飯食訖囑授卧具已便將五百苾芻隨
路而去往勝音城時影勝王并作勅書遣使
持去報仙道王曰承悟緣生得預流果復於
苾芻樂欲相見佛令五百苾芻遠赴祈請仁
可慇懃同大師想去城兩驛半許修治道路
嚴設香華治整四兵自來迎接又於城內閑
寂之處造一大寺營五百房牀榻卧具無令
闕乏飲食所須悉皆預辦若作如是供養事
者獲福無量使持書至授仙道王既讀書已
如言悉作苾芻既至賓迎入城即於空閑廣
博之處懸繒幡蓋嚴設道場請苾芻坐時有
無量百千大眾悉皆雲集爾時聖者迦多演

那隨彼機緣為說法要令諸大眾皆蒙利益
或得預流果者或得餘果乃至出家得阿羅
漢果或有發趣聲聞獨覺乘心者或有發趣
大乘者時勝音城有二長者一名底灑二名
補灑往詣聖者迦多演那所至已禮足白言
聖者我今欲於善說法律而為出家於聖者
所修治梵行時迦多演那知其心至即與出
家并受圓具觀其根器教以要法彼二便於
日夜之中勤修無倦斷一切惑證阿羅漢果
即昇虛空現諸神變身出水火便入無餘妙
涅槃界彼諸親族即火焚燒為供養已收其
餘骨造二窰觀波時仙道王於日中常詣
聖者迦多演那處聽說妙法既聽得已還入
宮中告諸宮人曰聖者迦多演那每常為我
說深妙法宮人白言大王有福逢佛出世因

成果滿得聞正法王告宮人曰爾等何因不
往聽法官人答曰我等內人無由數出若其
聖者迦多演那得入宮中為說法者我等當
聽王聞語已往聖者所頂禮雙足白言聖者
宮內女人樂欲聞法唯願尊者興慈愍心暫
入宮中隨彼所願時迦多演那白言大王世
尊制戒不許苾芻入王宮中為女說法王言
聖者若如是者誰入宮中為女說法答曰有
苾芻尼許入為說時仙道王聞是語已即作
書報影勝王曰宮內女人樂欲聞法頗有方
便得令苾芻尼來不時影勝王既覽來書便
往佛所禮雙足已白言大德彼仙道王復遣
書來云內宮妃后樂聞正法欲見苾芻尼其
事云何爾時世尊聞斯語已便作是念何苾
芻尼與彼城中宮人之類因緣感會共相濟

拔觀知世羅苾芻尼能化於彼佛告世羅苾芻尼曰汝當觀彼勝音城中官人之類尼白佛言謹受聖教禮佛足已往舊住處囑授卧具竟執持衣鉢與五百苾芻尼俱向勝音城影勝王復與彼書令遣迎接造房五百供給所須敷設道場為衆說法多人悟解發三菩提心時世羅尼日日自往王宮之內為妃后等宣說法要彼仙道大王妙解彈箏其月光夫人善能為舞曾於一時王在宮內自手彈箏月光起舞於其舞際見夫人身有無常相至第七日必當命終時王見已心生憂惱手所彈箏便投于地月光見已白言大王豈我舞曲不中絃管致使大王放箏於地王曰非關舞惡然我見汝身有死相於七日內必定身亡月光白王曰若如是者幸當見放我願

出家王曰共立要契可遂汝情若出家已斷諸煩惱證阿羅漢果者我便望斷若有餘結惑而命終者於所去處當告我知夫人曰爾時仙道王即引月光至世羅苾芻尼處禮足已白言聖者月光夫人欲於善說法律而為出家唯願聖者慈悲攝受與其出家并受圓具世羅報曰善哉大王即與出家并受圓具觀其業報知欲命終教授月光修無常觀月光依言而作於第七日忽爾命過生四大王衆天諸天法爾初生之時必起三念我何處死知在人中今生何處生在四大王衆天曾作何業於佛教中淨修梵行時月光天女作是念已若我不往禮世尊者是所不應即取瓔珞莊嚴其身即以種種上妙天華盛滿衣襟夜詣佛所天光是曜滿竹林園便以妙華

普散佛所頂禮佛足在一面坐爾時世尊觀
彼機性而爲說法彼聞法已得預流果說伽
陀曰

世界人天咸供養 能除業惑生老死
於百千生難得逢 我今幸遇誠希有

我依大師除結惑 今時獲得清淨眼

超度苦流昇彼岸 究竟當入涅槃城

時彼天女說此頌已頂禮佛足往勝音城仙
道王所時王於樓上獨寢天女既至身光太
明彈指作聲驚覺王睡王聞驚坐問曰作聲
者誰答曰我是月光王曰夫人可來與我共
卧天女報言大王我已身死生四大王衆天
人天事殊理無同宿王若欲得與我交歡者
於佛教中出家修道若一切煩惱悉永斷者
衆望都息若有餘惑而命終者生四王天與

十五

十七

我相見作是語已騰空而去時仙道王聞是
教已驚喜交集念出家事通夜不眠至天曉
已命大臣曰卿可往問月光大人今在何處
大臣白言彼已身死王聞便念我今不應蒙
大警覺不用其語處在居家可立頂髻太子
爲王付以國事我當於善說法律而爲出家
時仙道王告二大臣曰卿等當知我於頂髻
愛念情深於卿二人情義亦重可於頂髻處
止惡勸善我欲出家二臣聞已流淚交襟復
命頂髻曰如汝比來順我言教從今已去二
大臣言亦應聽受於諸國人以法而化我欲
捨俗出家太子聞已悲泣難勝時仙道王既
付囑已鳴鼓宣令普告國人曰所有國政委
付太子我欲出家我比爲王不能依法汝國
人等各相容恕時諸人衆聞是告已荷王恩

惠悉皆啼泣不能自裁王立太子以知國事多出財寶廣設無遮沙門婆羅門及貧下類無不周給將一侍者徒步而去向王舍城時頂髻王及國人衆悉皆隨後送別而歸其王漸去至王舍城在一園中暫停息已告彼人曰汝今可往白影勝王曰有仙道王今在城外使者即便往至王所以事具白王聞驚起告諸臣曰其仙道王多有兵衆何不預報忽來至此使者白王彼無兵衆惟一侍者王聞語已便作是念彼是刹帝利灌頂大王我今不應空無備擬獨引入城即便修治道路嚴飾城郭躬引四兵至仙道王所歡言執手共相慰問同乘一象入王舍城即以香湯澡浴奉上妙衣既飲食已問言王今何故棄大寶位將一侍人躬涉遠途而來至此答言大王

世五

十八

我無別事本意故來於世尊所欲求出家并受圓具淨修梵行志求解脫時影勝王翹身合掌作如是語善哉佛陀善哉達摩善哉僧伽具大慈悲有勝威力能令如是刹帝利灌頂大王捨尊勝位來詣佛所而求出家并受圓具修苾芻行時影勝王即將仙道王詣世尊所爾時世尊與無量百千四衆圍遶演說妙法遙見影勝王共仙道王欲來入衆告諸苾芻彼影勝王并將進物來至我所汝等當知於諸如來所有進奉無過導引受化有情作是語已默然而住時影勝王共仙道王俱至佛所禮雙足已在一面立白言世尊此是勝音國仙道大王足步而至欲於如來善說法律求出家受圓具修苾芻行唯願世尊慈悲攝受世尊即告仙道王曰善來苾芻可修

梵行王聞是語鬚髮自落法服著身瓶鉢在
 手威儀進止如百歲苾芻時影勝王禮佛而
 出仙道苾芻即依衆住於晨朝時著衣持鉢
 入王舍城次行乞食時諸士女百千萬衆聞
 彼入城俱來瞻仰官闈之類咸陞樓閣傾望
 竭誠共觀希有時彼苾芻既得食已還至本
 處飯食訖收衣鉢洗足而坐時影勝王諸臣
 翼從至仙道苾芻所躬申敬禮說伽陀曰
 勝音國大王 捨百千城邑 今乞餘殘食
 豈不生勞苦 先用妙金盤 衆寶以莊飾
 今但持瓦鉢 豈不生勞苦 先食香杭飯
 美饌隨所欲 今者食麤踈 豈不生勞苦
 先著迦尸服 妙氎及諸繒 今被糞掃衣
 豈不生勞苦 先處勝宮殿 侍衛以多人
 今獨樹下居 豈不生勞苦 先在妙牀禪

細輒隨情樂 今時卧草敷 豈不生勞苦
 先與上官后 娛樂鎮隨心 今時獨寢息
 豈不生勞苦 先乘無價象 寶馬及珍輿
 今時徒步行 豈不生勞苦 庫藏皆盈溢
 受用常隨意 今時無所有 豈不生勞苦
 時仙道苾芻既聞是語亦以伽陀而答之曰
 諸有難調事 我今皆伏除 乞食用資身
 如牛負輶輓 影勝王曰
 仁今有何意 作此憂愁語 心中所念者
 我悉相供給 仙道苾芻曰
 諸有樂法人 心無有憂戀 若不知法者
 從冥入於冥 大王應善聽 我今說正法
 由解正法故 生天得涅槃 此身無可愛

有一德應知	善調令住境	隨心即安樂
假使壽百年	形命終歸盡	云何為妻子
財食常貪著	妻子如怨家	珍財常畏失
我今皆捨棄	解脫諸憂惱	人命將盡時
呪藥不能救	神仙及諸聖	無能違拒者
天雖有威力	勝處受長年	衰相現前時
必死無能救	諸王得自在	威力無人敵
多財有名稱	終歸入死門	假令修苦行
勇猛越諸人	設多兵衆力	詎能超死苦
非空非海內	亦非山石間	無有地方所
不被死所害	非空非海內	亦非山石間
無有地方所	不被業所害	死後身腫脹
皮肉漸分離	惟餘白骨在	觀斯何可愛
諸骨咸消散	但有空髓體	形色甚可惡
誰當生愛樂	在熱處涼宮	若寒居暖室

常護持身命	不免死來侵	若人行善因
果不共他有	王等不侵害	是故應修福
若行十惡死	妻子皆不哭	殯送事隨宜
是名為惡死	若行十善死	妻子皆憶念
殯葬並如法	是名為善死	生時惟獨來
死時還獨去	自受於苦樂	無有共分者
伺命來取時	父子不相救	親屬及珍寶
無能贖命者	生老及病死	日夜恒隨逐
無有藏避處	終被死王牽	智者見是事
捨而求出家	當離煩惱海	不受胞胎患
我捨諸怨苦	得成苾芻性	終出生死獄
長趣涅槃城		
時影勝王蒙仙道苾芻為說妙法聞已恭敬		
深心渴仰自言聖者生死長遠卒難出離我		
處王位與寂靜相違但有隨喜未能解縛說		

是語已頂禮而去

根本說一切有部毗奈耶卷第四十五

音釋

誣	武夫切	誣	同也
劓	側義切	劓	側義切
斲	側義切	斲	側義切
髻	雙切	髻	雙切
悒	於汲切	悒	於汲切
輶	不安切	輶	不安切
輶	元切	輶	元切
輶	元切	輶	元切